



Ilaqtariinnermut Peqqissutsimullu Ataatsimiititaliaq  
 Inatsisartut

**Inuit naqinnernik ilisarinnissinnaangitsut Inuit innarluutillit  
 tapersorneqarnissaat pillugu Inatsisartut inatsisissaatut siunnersuut  
 UPA2019/205 malillugu tapersorneqarsinnaanerit pillugu apeqqummut  
 akissuteqaat**

05-04-2019  
 Suliap nr. 2018 - 8048  
 Akt. id. 10366636

Postboks 260  
 3900 Nuuk  
 Oqarasuaat (+299) 34 50 00  
 Naqitanik nassitsigasuaat  
 (+299) 34 66 66  
 E-mail: iian@nanoq.gl  
 www.naalakkersuisut.gl

Aallaqqaasiutigalugu Ilaqtariinnermut Peqqissutsimullu Ataatsimiititaliaq ataasinngornermi ulloq 18. marsi 2019-imi nuannersumik ataatsimiissimanitsinnut qutsavigerusuppara. Siunnersuummit inatsisunik teknikkikkut misissuataarneqarneranut atatillugu, inuit naqinnernik ilisarinnissinnaangitsut, siunnersuut malillugu qanoq tapersorneqarsinnaanerit pillugu ataatsimiititaliamiit apeqqutigineqarpoq, kingusinnerusukkut akissuteqarfigissallugu neriorsuinikuuvunga. Tulliuttuni tamanna malitseqartissavara.

Inuit naqinnernik ilisarinnissinnaangitsut eqqarsaatigalugit, ataavartumik sulisinnaanerisa annikillinerinik sunnerneqarsimasut, akimmiffiusinnaasut assigiinngitsut sunniivigeqatigiinnerini inuiaqatigiinni inuunermi tamakkiisumik sunniuteqarluartumillu allat naligalugit peqataasinnaanerinik akornusiisinnaasut, taakku Inuit innarluutillit pisinnaatitaaffii pillugit Naalagaaffiit Peqatigiit isumaqatigiissutaat (artikel 1-imi) takuneqarsinnaasut ilanngunneqarsimapput, taamaamat Kalaallit Nunaat pisariaqartinneqartumut tapersiisussaataavoq.

Taamatut tapersiisarneq Kalaallit Nunaanni pingaarnertut ilinniartitaanerup iluani tunniunneqartarpoq. Atuarfik pillugu Inatsisartut inatsisaanni assersuutigalugu § 15-imi allassimavoq, atuartut piginnaasamikkut ajornartorsiuteqarnertik pissutigalugu nalinginnaasumik atuartitsinerup iluani immikkut ikiorserneqarnissaminnik pisariaqartitsinerat tunniunneqarsinnaangippat, immikkut atuartinneqassapput allatullu annertusisamik immikkut perorsaanikkut ikiorserneqassallutik. Tamatumani ilaatigut atuartut atuarniarnermikkut kiisalu allattariarsornikkut ajornartorsiutillit pineqarput. Meeqqat atuarianni immikkut atuartitsisarneq aamma allamik immikkut ittumik perorsaanikkut ikiorsisarneq pillugit Namminersorlutik Oqartussat nalunaarutaanni aamma allassimavoq, immikkut atuartitsisarnermut aamma allamik immikkut ittumik perorsaanikkut ikiorsisarnermut ilaapput atuartitsinermut atortussat immikkut ittut teknikkikkullu iluaqusersuutit atuartup atuartitaaneranut atatillugu pisariaqartinneqartut (§ 3, imm. 1, nr. 4).

Inatsisiliornerli alla naapertorlugu ikorsiinissamut periarfissaqanngippat, Inuit innarluutillit ikiorserneqartarnerat pillugu Inatsimmut ilaassapput, taamaalillutillu taanna malillugu ikiorserneqarsinnaassallutik.

Apeqquq Ilinniartitaanermut, Kultureqarnermut Ilageeqarnermullu Naalakkersuisoqarfimmut tusarniutigineqarnikuvoq.

Inussiarnersumik inuulluaqqusillunga

  
Martha Abelsen